



UNIVERSITÄTS-  
BIBLIOTHEK  
PADERBORN

## Universitätsbibliothek Paderborn

**Stephani Balvzii Miscellaneorum Liber ... Hoc est,  
Collectio Veterum monumentorum, quæ hactenus  
latuerant in varijs codicibus ac bibliothecis**

**Baluze, Etienne**

**Parisiis, 1678**

Abbonis Abbatis Floriacensis epistola ad L. Abbatem Fuldensem.

**urn:nbn:de:hbz:466:1-14688**



ABBONIS ABBATIS  
FLORIANENSIS

*Epistola ad L. Abbatem Fuldensem.*

**F**ACVNDIÆ prerogativa cum vitæ merito & An. 996.  
sapientiæ doctrina mirabiliter intonanti Dom-  
no L. sancti Bonifacii carissimorum carissimo Ab-  
bati Florianensis cœnobij humilis Abbas Abbo spi-  
ritum Domini, qui replevit orbem terrarum, re-  
plere illius ipsius scientiam & intellectum. Caritas,  
quæ est vinculum perfectionis, dum nos ambos Re-  
mis positos conglutinaret labijs privatæ colloquio-  
nis, tot oratorios rivos, tantos sanctæ scripturæ favos  
bono zelo fulminea lingua vestra eructavit coram  
& secretò ut exclamans compellar dicere: *Diffusa* Psal. 44.  
*est gratia in labijs tuis. Propterea benedixit te Deus*  
*in æternum.* Dum ergo ad talia rutilantium verbo-  
rum fulgura stupui, coactus sum deinceps ubique  
confiteri vos tonitruum esse spiritus sancti, qui su-  
per Apostolos in igneis linguis descendit, qui etiam  
vos ardentem rompheam ad secandos improbos  
de templo suo septem donis gratiarum decenter  
elimavit. Inter hæc tandem erectis animi luminibus  
solares vestræ eloquentiæ radios aquilinis oculis  
conspicere volui; & sicut ait Ecclesiastes, frater fra- Prov. 18.  
trem adjuvans quasi civitas munita & fortis, ba-  
culum robusti adjutorij & columnam inseparabi-  
lis amicitiae vos in æternum, si placet, habere de-  
crevi. Hujus rei gratia flecto genua mea ad pa- Ephes. 3.  
trem, ut det vobis id ipsum sapere per Dominum  
nostrum Iesum Christum, & favus distillans labia



Vide vitam  
S. Abbonis  
cap. XI.

vestra memoriale nostrum hereditate possideant in  
sempiterna secula. Inter familiaria verborum nostro-  
rum arcana distillavit auribus nostris unum quod-  
dam eloquium vestra magnificentia, quod non mi-  
nùs adimplere, si Deus voluerit, satago quàm vi-  
tam perpetuam mercari ex voto. Pretiosarum re-  
liquiarum sancti patris Benedicti insignia postula-  
stis vobis dirigi, eò quòd indubitatum penitùs  
esset sanctissimam ipsius corporis præsentiam à  
nobis retineri, ideòque velle enixius in honore  
illius oratorium construi, itémque nobis de sancto  
Bonifatio aut de sacris artibus ceterorum sancto-  
rum nobis eadem recompensari. Adjecit insuper  
vestra incomparabilis bonitas quòd si nos urgueret  
super re domestica aliqua voluntas corroborare  
nostra privilegia per Romanæ auctoritatis stilum  
apostolicum, vos in omnibus & per omnia nostri  
fore fidelissimum collaboratorem. Hæc autem om-  
nia perficere voti erat quando magna principis  
Apostolorum membra supplex adij; sed Romanam  
Ecclesiam digno viduatam pastore heu proh dolor  
offendi. Vestra autem absentia profiteor ita affe-  
ctus sum sicut solet affici fœtus gallinæ conque-  
rens raucis vocibus abstractum esse unicum matris  
sue præsidium. Nuper autem audivi nuncium quod  
me lætificavit super aurum & topazium, erectum  
esse apostolicum decus per quendam imperialis san-  
guinis virum, totum virtutibus & sapientia com-  
positum. Vester verò reditus intonuit menti nostræ  
velut paradisiacæ reversionis ineffabilis concentus.  
Nunc igitur, sicut locuti sumus ad invicem, & hæc  
epistola vestris aspectibus se præsentat, per hos  
sancti patris Benedicti monachos audire placeat &  
audita perficere velut promisistis cum summa fide  
& devotione. Ipse autem idem spiritus, qui inspi-  
ravit omnis eloquentiæ flore Gregorium, inspiret



hujus suæ sanctæ Romanæ Ecclesiæ venerabilem Apostolicum, vobisque concedat ut sitis eidem ipsi dulcissimus à secretis, ad consolidandam dejectionem apostolicæ auctoritatis. Valete.

*Epistola encyclica monachorum Floriacensium  
de cæde Abbonis Abbatis.*

VNIVERSIS Abbatibus Christianique fidelibus Anno 1004.  
quoquo locorum habitantibus, Floriacensis conciola dejecta & patre viduata. Fletu penè absorptis, dolore contritis, manum porrigite spiritualis auxilij, patres sanctissimi, per affectum fraternæ caritatis. Pane mœroris potuque amaritudinis cibati, vestris orationibus mereamur recreari, quorum cythara lætitiæ versa est in luctum mœstitiæ, quorum organum luctuosè sonat lamentum, & jucunditas vocem tantummodo flentium. Pervenit gladius doloris usque ad animam, dum deploramus pro sanctæ religionis studio Domnum & Abbatem nostrum Abbonem excessisse à seculo coronatum martyrio, qui VVasconum gladijs felix promeruit feliciter beatorum martyrum socius fieri; cujus animæ contagia vestra oratio abstergat, qui vestri amator omniumque Christi servientium verus semper extitit dilector. Nobis quoque, quos orphanos reliquit, fraternis succurrite votis, & Deum omnipotentem placate orationum hostiis, ut dignetur sua gratia gregem decapitatum & pio patre orbatum consolari. Obiit Idibus Novembris, die natalis sancti Brici.

